

O temporal arrastra un cachalote morto ata o areal de Panxón

Escrito por Redación
Xoves, 26 Abril 2012 02:35



O temporal arrastra ata os areais de Panxón, un cachalote morto de 10 metros de lonxitude.

Durante a mañá, de onte mércores día 25, o [CEMMA](#) recibíu diversos avisos por parte dos mariñeiros de Panxón, Confraría de Baiona e Concello de Nigrán sobre a presenza dunha balea morta dentro da enseada de Panxón e a piques de varar.

A pesar da pronta resposta de Salvamento Marítimo e dos membros de [CEMMA](#) que enviaron efectivos á zona de inmediato, foi imposible evitar o varamento na praia de Panxón, nas proximidades da desembocadura do río Muiños. Tratábase dun exemplar macho de cachalote (*Physeter macrocephalus*) de aproximadamente dez metros de lonxitude, xa en avanzado estado de descomposición.

Durante a mañá desprazáronse ata a praia as autoridades municipais que mantiveron xestións coa Xunta de Galicia para proceder a súa retirada.

Segundo apuntan dende [CEMMA](#), dende o mes de febreiro mantense un convenio entre a Dirección Xeral de Conservación da Natureza e de Calidade Ambiental para facilitar a retirada

O temporal arrastra un cachalote morto ata o areal de Panxón

Escrito por Redación
Xoves, 26 Abril 2012 02:35

dos grandes cetáceos varados mortos, que tantos problemas ocasionan pola complexidade das operacións. Este convenio permitirá o achegamento de medios para a recollida, transporte e eliminación dos restos biolóxicos, evitando así que os corpos sexan deixados á deriva e causen males maiores á navegación ou transtornos noutros concellos litorais.

Membros de [CEMMA](#) asesorarán a retirada e analizarán a situación de cómo quede o exemplar na marea alta para proceder á retirada prevista para primeiras horas da mañá do xoves 26. Durante a tarde procederán á recollida de datos e mostras biolóxicas para tratar de averiguar as causas da morte, aínda que auguran dificultades dado o avanzado estado de descomposición.

O temporal achega aos cachalotes á nosa costa

Este é o segundo rexistro de cachalote varado en menos dunha semana, xa que hai uns días varou un exemplar moito máis grande en Malpica, puidera deberse ao achegamento de mandas desta especie á plataforma debido ao temporal.